

UNISSA mampu lahirkan ulama, sumber tenaga manusia bertakwa

Bismillahir Rahmanir Rahim
Assalamu'alaikum Warahmatullahi
Wabarakatuh

ALHAMDULILLAH, setinggi-tinggi kesyukuran dipanjatkan ke hadirat Allah Subhanahu Wata'ala kerana dengan izin dan limpah rahmat-Nya jua kita dapat berhimpun daLam majlis yang berkebahagian ini, iaitu Majlis Doa Kesyukuran Sempena Ulang Tahun Ke-10 Penubuhan UNISSA.

Terlebih dahulu saya dengan tulus ikhlas mengucapkan setinggi-tinggi tahniah kepada seluruh warga UNISSA, kerana pada 1 Januari 2017 yang lalu, genaplah 10 tahun usia UNISSA. Syabas dan tahniah setinggi-tingginya, bukan setakat UNISSA kini telah mencapai usianya satu dekad, tetapi juga atas pelbagai pembangunan dan kejayaan yang telah di capai oleh UNISSA.

Saya percaya, kejayaan ini tidak akan dicapai tanpa semangat kerjasama yang tinggi, sokongan padu dan kerja keras daripada semua pihak demi untuk merealisasikan hasrat murni Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam dalam penubuhan UNISSA, iaitu sebagai mercu kegemilangan Islam di Negara Brunei Darussalam yang berperanan melahirkan para ulama dan cendekiawan berwibawa yang diperlukan oleh negara.

Saya juga berkeyakinan tinggi bahawa UNISSA akan sentiasa berusaha keras dalam mempertingkatkan kualiti akademiknya, dalam melahirkan graduan yang berwibawa melalui pengajaran dan pembelajaran yang efektif, penyelidikan dan penerbitan yang berimpak tinggi, selaras dengan visinya untuk menjadi sebuah universiti Islam tulen bertaraf antarabangsa yang progresif dan dinamik berteraskan Al-Quran dan Al-Sunnah.

Sebagai sebuah institusi pengajian tinggi Islam di negara ini, UNISSA perlu memainkan peranan penting dalam memastikan para graduan yang dihasilkan itu benar-benar dilengkapi dengan pengetahuan agama yang betul dan mantap serta mampu menjadi benteng yang kukuh terhadap segala anasir-anasir yang tidak selaras dengan ajaran Islam yang diamalkan di negara ini.

Inilah keunikan misi UNISSA. UNISSA bukan sahaja diharap menghasilkan para graduan yang memiliki ilmu agama yang mantap dan intelektual yang tinggi dari sudut akademiknya, bahkan juga mempunyai sahsiah dan akhlak yang terpuji, berwibawa dan juga bertakwa. Dalam hal ini, UNISSA hendaklah memastikan *environment* pengajaran. Pembelajaran, penyelidikan dan penerbitan di UNISSA ini tidak dicalar, diprovokasi dan dipengaruhi atau dicemar oleh pemikiran-pemikiran yang bertentangan dengan ajaran Ahli Sunnah Waljamaah.

UNISSA juga perlu memastikan para pelajar akan sentiasa mengamalkan nilai-nilai murni yang terkandung dalam falsafah negara 'Melayu Islam Beraja' (MIB)



MENTERI Pendidikan, Yang Berhormat Pehin Orang Kaya Indera Pahlawan Dato Seri Setia Awang Haji Suyoi bin Haji Osman semasa berucap pada Majlis Doa Kesyukuran Sempena Ulang Tahun Ke-10 Penubuhan Universiti Sultan Sharif Ali (UNISSA), pada 13 Rabiulakhir 1438 Hijrah / 12 Januari 2017 Masihi, bertempat di Auditorium UNISSA.

dalam setiap tindak tanduk mereka, sama ada dalam akademik dan juga kehidupan sosial mereka.

Dalam kesempatan ini, sukacita juga saya berpesan kepada seluruh pelajar UNISSA agar memanfaatkan sepenuhnya peluang mengikuti pengajian di UNISSA ini. Para pelajar perlu sedar bahawa dalam situasi ekonomi global yang tidak menentu ketika ini, mereka perlu sentiasa berusaha melengkapkan diri mereka dengan pelbagai kemahiran agar menjadi graduan yang berdaya saing dan kompetitif.

Oleh sebab itu, saya menyarankan UNISSA supaya sentiasa mengambil kira kadar pengangguran para graduan dan peluang pekerjaan yang sangat kompetitif di negara ini. Perkara ini sering kali telah disentuh oleh Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam dan baginda menyarankan agar UNISSA dan juga institusi-institusi pengajian tinggi yang lain di negara ini supaya memastikan program-program yang ditawarkan itu sentiasa relevan dan berkualiti untuk menghasilkan para graduan yang *marketable* dan *future ready*. Saya menyokong penuh terhadap inisiatif UNISSA dalam menjenama semula "Fakulti Perniagaan dan Sains Pengurusan" menjadi "Fakulti Ekonomi dan Kewangan Islam" dan menubuhkan fakulti baharu, iaitu "Fakulti Pengurusan Pembangunan Islam". Saya juga mengambil maklum dan menyokong penuh usaha-usaha penelitian semula terhadap program-program

akademik yang sedang ditawarkan. Ini termasuklah kursus berkaitan "Keusahawanan" yang akan menjadi kursus wajib atau mandatori bagi semua program akademik sebagai nilai tambah kepada bidang-bidang akademik yang diikuti.

Saya juga merasa optimis terhadap hala tuju dan perancangan UNISSA, terutama sekali dalam usaha menubuhkan sebuah Pusat Kecemerlangan Penyelidikan Halal dalam masa yang terdekat ini. Saya berharap pusat ini nanti akan menjadi pemangkin kepada hasrat Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam untuk menjadikan Negara Brunei Darussalam sebagai *hub halal global* dan membuka ruang lebih luas terhadap pasaran halal di peringkat antarabangsa.

Selain itu, program-program pengajian yang berkaitan dengan pelaksanaan Perintah Kanun Hukuman Jenayah Syariah 2013 yang berjalan ketika ini hendaklah diteruskan, dikukuhkan dan dikembangkan lagi bagi memastikan pelaksanaannya bertambah lancar dan mantap.

Begitu juga dengan-program-program lain yang menjadi *niche* UNISSA seperti Tafsir, Hadith, Dakwah, Aqidah, Syariah, bahasa Arab dan lain-lain lagi yang mampu melahirkan ulama dan sumber tenaga manusia yang bertakwa dan berwibawa. Malah lebih jauh dari itu, UNISSA juga perlu meneroka lebih jauh lagi bidang-bidang baharu yang berkaitan dengan pembangunan dan keperluan semasa negara. Usaha-usaha yang sedemikian itu, adalah perlu dirancang dengan rapi bagi memastikan para graduan UNISSA menjadi generasi mapan dan mampu merealisasikan Wawasan Negara 2035.

Kualiti sesebuah universiti itu bergantung kepada kualiti tenaga akademiknya. Sebagaimana yang biskita sedia maklum, Skim Perkhidmatan Tenaga Akademik (SPTA) yang telah diperkenalkan oleh Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam pada bulan April 2014 yang lalu itu, adalah untuk memastikan para tenaga akademik di UNISSA dan institusi pengajian tinggi yang lain di Negara ini benar-benar mencapai kualiti tenaga akademik yang mampu mempertingkatkan kualiti akademik, penyelidikan dan khidmat kepada masyarakat.

Saya berharap agar UNISSA sentiasa memastikan para tenaga akademiknya terus berusaha keras mempertingkatkan kemahiran dan komitmen mereka dalam membangun UNISSA dan negara.

Saya juga menyarankan agar para tenaga akademik khususnya yang belum memenuhi syarat untuk berpindah ke SPTA ini atas sebab-sebab kelayakan akademik atau sebab-sebab tertentu, hendaklah berusaha lebih gigih untuk mempertingkatkan pencapaian masing-masing.

Ke muka 10

Dari Sidang
Pengarang.

16 JANUARI 2017 BERSAMAAN 1438 ربيع الأخير 18

IBADAH SEMBAHYANG MEMPUYAI BANYAK KELEBIHAN, MANFAAT

Ibadah sembahyang mempunyai kedudukan yang amat tinggi di sisi agama Islam dan ia juga adalah rukun Islam kedua yang wajib ditunaikan setelah mengucap dua kalimah syahadah. Pentingnya ibadah sembahyang ini kerana ia amalan pertama yang dihisab oleh Allah Subhanahu Wata'ala di akhirat nanti.

Perintah untuk mendirikan sembahyang bermula sejak berlakunya peristiwa Israk dan Mikraj yang dilalui oleh Baginda Rasulullah Sallallahu Alaihi Wasallam.

Sebagai umat Islam, kita patut menyedari bahawa melakukan ibadah sembahyang adalah satu tuntutan dan bukan satu perkara yang boleh diambil remeh. Justeru adalah tanggungjawab kita sebagai umat Islam untuk menunaikan tuntutan ini dan menyerapkan perkara ini ke dalam minda anak-anak kita. Kewajipan mengerjakan sembahyang juga masih dituntut terhadap orang yang sakit atau orang yang kurang upaya. Cuma cara mengerjakan sembahyangnya adalah berbeza mengikut keupayaan pesakit itu sendiri sama ada secara berdiri, duduk atau berbaring.

Di samping ia menjadi satu tuntutan, ia juga terdapat ganjaran yang besar, serta banyak manfaat dan kebaikan apabila melaksanakan ibadah sembahyang. Ia dapat membantu menyelamatkan manusia daripada azab akhirat. Sembahyang juga dapat menghilangkan rasa resah gelisah dan boleh memberikan ketenteraman, ketenangan dan kebahagiaan hidup di dunia dan di akhirat.

Keperluan dan kewajipan mendirikan sembahyang sering kali diterangkan dalam Al-Quran sebagaimana firman Allah Subhanahu Wata'ala dalam Surah Al 'Ankabut, ayat 45 : Tafsirnya : "Dan dirikanlah sembahyang. Sesungguhnya sembahyang itu mencegah dari perbuatan yang keji dan mungkar."

Pada Khutbah Jumaat baru-baru ini ada menerangkan bahawa antara kelebihan dan kebaikan mendirikan sembahyang juga termasuk dapat membantu diri sendiri, keluarga dan masyarakat untuk membina generasi yang berakhlak mulia dan berbudi pekerti yang baik.

Sembahyang juga dapat membantu dalam menangani pelbagai gejala sosial yang boleh merosakkan kehidupan masyarakat seperti rasuah, membunuh, merompak, zina dan perbuatan maksiat yang lain dan sembahyang juga menjadi kunci utama untuk mendapatkan rezeki yang halal dan diberkati oleh Allah Subhanahu Wata'ala.

Di samping itu sembahyang juga dapat membersihkan dan mensucikan diri seseorang sama ada rohani mahupun jasmani, ini jelas sebagaimana sabda Nabi Muhammad Sallallahu Alaihi Wasallam : Maksudnya : "Daripada Abu Hurairah Radhiallahuanhu : Bahawasanya dia pernah mendengar Rasulullah Sallallahu Alaihi Wasallam : "Jika ada suatu sungai di depan rumah seorang yang di situ dia mandi lima kali dalam sehari, masihkah ada kotoran pada dirinya?" Para sahabat menjawab : "Tidak ada sedikit pun kotoran yang tersisa pada dirinya." Rasulullah Sallallahu Alaihi Wasallam bersabda: "Begitulah perumpamaan sembahyang fardu lima waktu yang dengannya Allah menghapus dosa orang yang mengerjakannya." (Riwayat Imam Al-Bukhari).

Sembahyang merupakan satu tanggungjawab yang mesti dilaksanakan. Maka walau sesibuk mana kita dalam menjalankan kehidupan seharian, jangan lalai dan lupa untuk melaksanakan ibadah sembahyang. Tunaikan sembahyang pada waktunya dan perlu sering diingat kesempurnaan ibadah sembahyang menentukan kesempurnaan ibadah yang lain. -
Ketua Penyuntingan (Ss)

Ramalan Cuaca 3 Hari		
ISNIN	SELASA	RABU
SANDAR SERI BEGAWAN		
32°C ☀️ 25°C ☁️	32°C ☀️ 25°C ☁️	32°C ☀️ 26°C ☁️
MUARA		
32°C ☀️ 25°C ☁️	32°C ☀️ 25°C ☁️	32°C ☀️ 26°C ☁️
PERAN BANGAR		
32°C ☀️ 25°C ☁️	32°C ☁️ 25°C ☁️	33°C ☁️ 25°C ☁️
PERAN TUTONG		
32°C ☀️ 25°C ☁️	32°C ☀️ 26°C ☁️	32°C ☀️ 26°C ☁️
PERAN SERIA		
32°C ☀️ 25°C ☁️	33°C ☀️ 25°C ☁️	32°C ☀️ 25°C ☁️
RANLA BELAIT		
32°C ☀️ 25°C ☁️	33°C ☀️ 25°C ☁️	33°C ☀️ 25°C ☁️

WAKTU SEMBAHYANG										
firman Allah Ta'ala dalam Surah Al-Ankabut, ayat 45, bermaksud: "...dan dirikanlah sembahyang sesungguhnya sembahyang itu mencegah daripada fasya' dan mungkar."										
Masihi JANUARI	HARI	Hijrah RABIULAKHIR	IMSAK	SUBUH	SYURUK	DUHA	ZUHUR	ASAR	MAGHRIB	ISYAK
16	ISNIN	18	5.02	5.12	6.34	6.58	12.31	3.53	6.26	7.40
17	SELASA	19	5.02	5.12	6.34	6.58	12.31	3.53	6.26	7.40
18	RABU	20	5.02	5.12	6.34	6.58	12.32	3.53	6.27	7.40
19	KHAMIS	21	5.03	5.13	6.35	6.58	12.32	3.54	6.27	7.40
20	JUMAAT	22	5.03	5.13	6.35	6.59	12.32	3.54	6.28	7.41
21	SABTU	23	5.03	5.13	6.35	6.59	12.33	3.54	6.28	7.41
22	AHAD	24	5.04	5.14	6.35	6.59	12.33	3.54	6.28	7.41

Daerah Brunei Muara & Temburong. Peringatan: Waktu-waktu sembahyang bagi Daerah Tutong ditambah 1 minit dan Daerah Belait ditambah 3 minit

TALIAN KECEMASAN	AMBULANS 991	POLIS 993	BOMBA 995	PENYELAMAT 998	(Talian Darussalam) JABATAN PERKHIDMATAN ELEKTRIK JABATAN PENGANGKUTAN DARAT. KEMENTERIAN PEMBANGUNAN DAN e-darussalam 123	NDMC 2380214
---------------------	-----------------	--------------	--------------	-------------------	---	-----------------